

ORD CUSCHINA

Dar impuls a las columnas

Durant la stad publicgescha la FMR en La Quotidiana adina serias spezialas da «Columns» sin la davosa pagina. Las davosas tsching emnas ha la redacziun republictà differents columnas dals ultims 25 onns, damai che La Quotidiana festivescha quest onn gea ses anniversari da 25 onns.

Per la fin da questa stad, vul dir durant las proximas trais emnas, cuntinuescha la FMR cun in'ulteriura seria, numnamain cun 15 Impuls emess tar RTR. La redacziun da la FMR ha tschernì ils Impuls da tsching auturas: *Carin Caduff, Pia Valär, Sara Francesca Hermann, Silvana Derungs* ed *Ursina Guldemond-Netzer*. Ellas han scrit e prelegì lur texts per l'emissiun Impuls en il decurs dals davos 20 onns. En lur texts vai per la patria, per ils tratgs «characteristics» d'animals, per la lingua rumantscha e perfin per nursas nairas. Bun divertiment cun las «Columns-Impuls».

Per la redacziun FMR,
David Truttmann, schefredactur

GRISCHUN

La dischoccupaziun

è sa reducida vinavant il fanadur

En il Grischun èn 659 persunas stadas senza lavur il fanadur. Quai èn 105 pli pauc ch'anc il zercladur. La quota da dischoccupaziun munta a 0,6%. Quai ha communitgà l'Uffizi per industria, mastergn e lavur dal Grischun. La sminuziun saja cunzunt d'attribuir al fatg che dapli persunas hajan chattà lavur en la hotellaria.

Il fanadur hajan passa 100 manaschis survegnì indemnisaziun per lavur reducida en il Grischun. Quai è bunamain il dubel ch'anc il zercladur. Quest augment na saja betg da contribuir a dapli manaschis ch'hajan actualmain introducì lavur curta, mabain a pajaments supplementars per ils ultims dus onns, declera l'uffizi.

En l'entira Svizra è il dumber da dischoccupads sa reduci sin radund 91 400 persunas. Quai correspunda ad ina quota da dischoccupaziun da 2,0%. (rtr/fmr)

CUIRA

Polizia ha sclerì seria d'enguladitschs



In dals autos en il qual il culpabel ha tschertgà caussas da valita.

FOTO POLIZIA CHANTUNALA

La Polizia chantunala ha chattà in culpabel suspectà suenter 40 ladermitschs en la regiun da Cuir. Il Svizzer da 37 onns duaja avair engulà l'avrigl e matg daners e cartas da debit principalmain or d'autos che na sajan betg stads serrads. La summa da delict munta a bunamain 10 000 francs – sco la polizia ha communitgà glindesdi en ina comunicaziun a las medias. En pli haja il lader chaschunà donn material da radund 2000 francs. L'um vegnia denunzià pervi da delicts da facultad e delicts narcotics. (rtr/fmr)

LA CIFRA DAL DI

4700

participantas e participants

Minca è dals 11 fin ils 21 d'avust ospitant dals segunds campionadis europeics d'atletica leva – in'occurrènza da sport multifara. Sco quai che SRF scriva, vegnan durant 11 dis surdads 177 titels resp. sets da medaglias. 4700 atletas ed atlets da 36 differents naziuns èn s'annunziads per l'occurrènza. (fmr/sab)

RAPPORT ANIMALS DA RAPINA GRONDS

Lufs pitschens ed almain dus urs

Ils ultims dus onns èn vegnids identifitgads 82 differents lufs en il Grischun. Quai rapporta l'Uffizi da chatscha dal chantun Grischun en il rapport quartal. Ed: Almain dus urs èn puspè en l'Engiadina.

SANDRO BUCHLI/FMR

En il focus dal rapport quartal dals animals da rapina gronds stat cleramain il luf. Ils ultims dus onns sajan vegnids identifitgads 82 differents lufs en il chantun. Quai na saja dentant betg ina stimaziun precisa dal dumber, perquai che il destin dals lufs identifitgads è betg enconuscent en blers cass e la identificaziun genetica è betg cumpletta. Ins possia quintar dapertut cun lufs, ed i saja era da quintar cun reproduziuns, er nua che lufs pitschens èn anc betg confermads da l'Uffizi. La FMR ha rimnà intgins fatgs or dal rapport dals animals da rapina gronds.

4 trieps da lufs cun lufs pitschens confermads

Tar quatter trieps da lufs èsi vegnì confermà ch'i ha dà lufs pitschens:

- Tar il triep da Valgronda èn vegnids confermads dus lufs pitschens.
- Tar il triep dal Moesa èsi vegnì confermà quatter lufs pitschens.
- Tar il triep Beverin ha l'Uffizi da chatscha e pestga pudì confermar glindesdi suentermezdi almain 4 lufs pitschens.
- Tar il nov triep en Lumnezia (guarda box, stan: 8 d'avust 2022) èn vegnids fotografads dus lufs pitschens.

243 animals stgarpads e dus lufs sajettads

Enfin ils 4 d'avust 2022 èn vegnidas dumbradas 61 atargas da lufs. Tut en tut èn vegnids mazzads 243 animals da niz, per gronda part nursas e chauras, ma er in lama e duas



In urs traplà d'ina trapla da fotografia en la Val d'Assa datiers da Ramosch, fanadur 2022.

FOTO DA PRESSA

In triep da lufs en Lumnezia

Glindesdi suentermezdi ha l'Uffizi per chatscha e pestga dal Grischun confermà, ch'i dat en Lumnezia in triep da lufs. Il terrior dal triep da lufs «Wannaspitz» sa chat-ta en las vischnancas da Val s. Pieder, Lumnezia e parts da la vischnanca dal Ilanz/Glion. Almain dus lufs pitschens èn vegnids fotografads cun ina trapla da fotografias.

vatgas-mamma. Ils guardiachatscha han il segund quartal sajettà dus lufs giuvens dal triep da Beverin ch'han attatgà il fanadur duas vatgas en la Muntogna da Schons.

Lufs ed umans

En il segund quartal ha ina persuna privata annunzià ina sentupada cun in luf sin l'Alp Grüm en il Puschlav. Il luf saja suandà la persuna pliras minutas. In pèr dis pli tard è vegnì annunzià en la vischinanza dal San Bernardino in sgrignir dad in luf, senza dentant vesair in tal. Las observaziuns n'han betg pudì vegnir verificadas da l'Uffizi da chatscha e pestga.

Trais urs en l'Engiadina?

Dapi il zercladur è almain in urs da viadi en la zona da cunfin Engiadina Bassa – Val Müstair – Vnuost. Ils 17 da fanadur èn vegnids fotografads cun ina trapla fotografica en la Val S-Charl ed en la Val d'Assa dus urs differents. Ils 4 d'avust è vegnida annunziada ina ulteriura observaziun dad in urs en la Val Chamuera en l'Engiadina'Ota. I n'è dentant betg pussaivel da dir sch'igl è trais urs en l'Engiadina, per lez mancan las indicaziuns geneticas. Actualmain èsi tenor l'Uffizi da chatscha e pestga dus urs en l'Engiadina.

Il luf tscherver ed il schacal mellen

Il luf tscherver è vegnì observà en la Surselva ed en l'Engiadina Bassa. Plinavant è il 14 d'avrigl vegnì fotografà dad in guardiachatscha in schacal mellen a Versomi. Trais dis pli tard è in schacal mellen vegnì fotografà dad ina trapla da foto a Mumpè Tujetsch.

Castrisch cun victoria dubla

Emprim e segund post per Castrisch en la concorrenza da gruppas tar ils tiradurs giuvens. La gruppa da Sedrun-Tujetsch vegn vicecampiunessa grischuna en la categoria giuvenils. En il tir singul han Ronja Levy e Lucas Caviezel fatg ina medaglia.

GION NUTEGN STGIER/FMR

A Versomi ha gi lieu il di grischun dals tiradurs giuvens. Da la partida èn stats 100 mats e mattas da diesch fin 20 onns. Organizada è l'occurrènza vegnida da la Societad da tir Signina cun ses president *Hans Stucki*. La garda giuvna da tir dal Grischun ha profità da las bunas relaziuns e da la vista eccellente cun sajettar resultats stupents. Persvas han er ils mats e las mattas da la Surselva e quai cunzunt en la concorrenza da las gruppas. Quella è era gist il campinadi chantunala da gruppas tar ils giuvens e tar ils giuvenils.

Be trais puncts differenza

En la concorrenza da gruppas tar ils tiradurs giuvens U21 è la tensiun stada gronda fin tar il davos culp. Sa qualifitgadas per quel campin chantunala avevan 16 gruppas. Partida en la concorrenza sco gronda favurita è lura la gruppa Castrisch I, ella che aveva già gudagnà la runda da qualificaziun. A Versomi èsi lura vegnì tar in vair cumbat intern tranter las dus gruppas Castrisch I e Castrisch II. La surpraisa è lura bain stada che Castrisch II ha gudagnà il campinadi grischun cun in resultat da 685 puncts. Castrisch I ha tratg in punct damain ed uschia chaschunà ina victoria dubla per la Surselva. Cumpletà il podest ha la gruppa da Tavau che ha fatg in resultat da 683 puncts. Tranter la gruppa victura e la gruppa cun il terz plaz è la differenza da puncts be stada trais puncts, uschia che en quella concorrenza da gruppas n'ha segir betg mancà la tensiun. Tar ils giuvenils ha la gruppa cun duas mattas ed in mat d'Andeer gudagnà cler cun 491 puncts. Segunda è vegnida en quella categoria da gruppa U15 la gruppa da Sedrun-Tujetsch che ha sajettà 484 puncts. Cumpletà il podest ha la gruppa Engiadina Bassa.

Fabio Giger e Livio Tschärner èn ils victurs

75 mats e mattas han sajettà la concorrenza singula en la categoria giuvens U21. Cun *Fabio Giger* (Pasqual) ha in dals gronds favurits gudagnà il tir. Giger è giastà trais giadas il pli sisum il podest (2016/2018/2019) tar ils giuvenils ed ussa per l'emprima giada er en la categoria dals giuvens. A Versomi ha il tiradur da 17 onns fatg 93 da 100 puncts pussaivels. Segund è vegnì *Ray Perfler* (Favugn) e cumpletà il podest ha *Ronja Levy* (Sedrun-Tujetsch). Tar ils giuvenils cun ina participaziun da 25 mats e mattas sa numna il victur *Livio Tschärner* (Schiers/Aschera). Il mat da 12 onns ha sajettà fitg bain cun far in resultat da 91 puncts. *Lucas Caviezel* (Vrin) ha tera tratg cun 90 puncts in resultat excellent ed è vegnì grazia a quel sin il segund post tar ils giuvenils. Terza è vegnida *Rajmonda Omura* (Andeer) cun er avair fatg 90 puncts.

Las rangaziuns cumpletas èn publicgadas sin la pagina d'internet: www.kbsv.ch.



Castrisch II, la gruppa victura categoria U21: (da san.) Franco Casutt, Lina Decurtins, Jan Capaul ed Eric Derungs.



Il podest singul categoria U21. (da san.) Ray Perfler, Fabio Giger e Ronja Levy.



Ils megliers da la categoria U15, (da san.) Rajmonda Omura, Livio Tschärner e Lucas Caviezel.

FOTOS GION NUTEGN STGIER